

DARI SEBULAN KE SEBULAN

Dalam pilihan raya negeri PAS telah menang di Kelantan dan Terengganu – ia memerintah di sana. Ini disyukurkan dan disambut oleh sekalian orang terutamanya yang berjiwa Islam. Kemenangan PAS di sini tidaklah ia suatu kemenangan yang harus akan membawa faedah-faedah yang besar kepada umat Islam di sana jika sekiranya tidak ada puak-puak pembangkang kelak di dalam Majlis Mesyuarat *Federal* kerana harus orang-orang di Terengganu dan di Kelantan akan “dihukum” oleh Perikatan. Hukuman itu ialah dengan menyempitkan pembahagian *Federal* kepada kedua-dua negeri itu. Sekiranya Perikatan berbuat demikian maka jika PAS tidak berjaga-jaga harus kelak kepercayaan orang ke atasnya akan kurang bahkan akan hilang. Tanggungjawab-tanggungjawab PAS di Kelantan dan di Terengganu besar kerana itu hendaklah mereka bersungguh-sungguh bekerja dan berusaha dan jika terjadi “hukuman” itu nanti maka janganlah segan-segan menerangkan kepada rakyat.

* * *

Untuk bertanding dalam pilihan raya **parlimen** Persekutuan yang terdiri dari 104 buah kerusi maka PAS bertanding di dalamnya 58 buah kerusi. Di antara pemimpin-pemimpin PAS yang bertanding itu banyak yang dari barat berhijrah ke timur untuk mencari tempat bertapak termasuk Yang di-Pertuanya sendiri Dr. Burhanuddin al-Helmi. Orang-orang banyak bertanya mengapa Dr. Burhanuddin bertanding? Tidakkah molek baginya hanya berdiri di belakang sahaja kerana yang demikian lebih baik pada pandangan umat Islam daripada duduk bersama-sama merebut kerusi? Selain itu di dalam “hijrahnya” itu adakah orang-orang di sana reda dengan langkah demikian? Kajilah baik-baik soal ini supaya jangan digunakan orang kelak menyerang Islam dengan mutlak kerana perbuatan-perbuatan yang tidak difikirkan.

Ada orang-orang yang berfaham **sosialis** yang berkata bahawa dengan pengertian sosialis itulah sahaja dapat agama Islam berjalan di negeri ini! Agama Islam, katanya sesuai dengan faham sosialis dan kerana itulah ia mencalonkan dirinya di dalam parti sosialis. Orang-orang Islam yang mengenalinya hanya tersenyum. Orang mengerti bahawa barangkali ia mahir di dalam pengajian sosialis tetapi alam¹ perkara agama jahil! Jadi bagaimana ia boleh membanding di antara kedua-dua faham yang salah satu daripadanya ia jahil di dalamnya? *Lā hawla wa lā quwwata illā billāh!* Ini lain tidak bung, mau pancing orang-orang kampung yang masih tebal pengertian agamanya!

* * *

Mufti Selangor dengan berani dan dengan tegas telah membidas Kolej Islam sebagai sebuah kolej yang tidak menjalankan pengajian-pengajian Islam yang sebenarnya, tidak menjalankan langkahnya seperti yang ditaja semula. Mendengar itu orang-orang tersenyum bahkan Encik Mustafa al-Bakri menjawab bahawa kolej itu cara pelajarannya tidaklah seperti pelajaran di pondok. Ini benar! Mufti itu rupanya lupa bahawa sekarang orang mau maju terus tidak mau balik ke belakang – cara belajar hanya untuk mati tidak perlu lagi. Kalau ada orang memberi masalah tidak ditelan terus sahaja tetapi mesti dibahas dan kalau tidak tahan bahas jangan keluar. Al-Sheikh Abdul Raof Pengelola Kolej Islam itu pula mengatakan bahawa ia mempelawa mufti itu melawat kolej – kemudian memberi nasihat apa-apa yang kurang atau bagaimana yang baiknya – jangan hanya membidas sahaja tetapi tidak memberi syor untuk memperbaiki. Semua

Sambungannya pada muka 43

¹ Kesalahan ejaan teks. Perkataan sebenar ‘dalam’

Dari Sebulan ke Sebulan

Sambungan dari muka 7

orang dikatakan salah tetapi kalau diajak berbahas mencari kebenaran cabuuuuut!

* * *

Sultan Selangor, di dalam perjumpaan di hadapan guru-guru di Morib baharu-baharu ini dikatakan bahawa ajaran “Kaum Muda” itu salah sebab itu sesesiapa diketahui mengajar pelajaran itu hendaklah diberhentikan! Menyalahkan memang mudah tetapi adakah orang yang menyalahkan itu sebenarnya orang yang mengerti agama dan faham tentang hukum-hukum agama? Kalau Sultan mau pakai-pakai dengar lalu menyesatkan orang yang berfaham kepada al-*Qur’ān* dan al-*Hadīth* maka jagalah kebinasaan dan keruntuhannya. Gereja Kristian menaburkan segala pengajiannya kepada umat Islam tidak ditegah tetapi orang yang berfaham dan mengikut ajaran *lā ilāha illā Allāh Muḥamadun rasūlu Allāh* – bersembahyang, berpuasa, berzakat dan haji menjadi salah – orang hanya berkata *mashā’ a Allāh!*

* * *

Perikatan ribut seketika! M.C.A mau supaya mereka diberi 40 buah kerusi di dalam pilihan raya parlimen Federal! Pertentangan di dalam M.C.A timbul. M.C.A berjuang bukan tujuan perkauman telah dapat dibuktikan dan ketulusan Sir Cheng Lock Tan dapat dilihat. Anak Sir Cheng Lock Tan megatakan ayahnya didesak menandatangani suatu surat menganjurkan supaya M.C.A mesti mendapat 40 kerusi supaya kelak apabila ada langkah mau mengubah perlumbagaan yang ada suara tidak cukup! Tetapi Dr. Lim membalias dan akhirnya tembelang pecah di dalam mana tulisan tangan Sir Cheng Lock Tan disiarkan betul-betul menganjurkan kepada tujuan itu. Dengan ini orang-orang yang mengikuti sejaran perkembangan perjuangan Melayu tersenyum kerana mereka tahu siapa sebenarnya Sir Cheng Lock Tan di dalam perjuangannya untuk merebut

hak-hak keutamaan orang-orang Melayu. Sila baca semula buku “Amaran” oleh ‘Idrūs di sana dapat dikaji semula keadaan sebenar di dalam perjuangan orang-orang Melayu.

* * *

Sekarang telah timbul suara-suara daripada orang-orang Melayu sendiri bahawa sesiapa yang berjuang semata-mata kerana maslahat bangsanya sahaja maka perjuangan itu disebut perjuangan perkauman – ini akan merosak maslahat orang-orang itu sendiri dan tujuan kerajaan yang memerintah. Kata orang Melayu ini kita berjuang adalah untuk Malayan. Orang-orang Melayu yang di luar parti, masing-masing guru kepala kerana orang itu megetahui dahulu bahawa orang ini “jaguh” di dalam menuntut hak-hak Melayu! Bagaimanakah boleh disatukan satu-satu bangsa yang berpengertian dan beradat resam lain akan dapat bersatu di dalam suatu bangsa Malayan? Sampai sekarang Tunku Abdul Rahman tidak pernah menyebut rupa bangsa di Persekutuan Tanah Melayu ialah Malayan bahkan Dato’ Razak, kalau tidak khilaf telah terang-terang mengatakan bahawa perjuangan UMNO ialah rupa bangsa Melayu! Melayu satu bangsa dan kerana itu perjuangannya untuk bangsanya mesti berjalan terus! Sesiapa yang berjuang lain daripada ini harus kelak akan dituduh oleh orang-orang Melayu sebagai pengkhianat kepada bangsanya – tidak percaya cuba.

* * *

Bagi orang-orang yang beragama Islam yang yakin akan ajaran Islam yang sebenarnya sudah tentu tidak mau menjadi bangsa Malayan kerana ia adalah diwajibkan oleh Tuhan untuk menegakkan kalimah Islam, menegakkan hukum-hukum Islam di mana ia berada - kewajipan ini sama ada boleh tercapai atau tidak adalah mesti diperjuangkan! Kerana itu kalau ada tujuan mengubah kebudayaannya maka bermakna mengubah dasar-dasar hidupnya sedang Kongres Kebudayaan di Melaka menghendaki bahawa kebudayaan Melayu ialah kebudayaan yang tidak boleh berlawanan dengan ajaran Islam. Kalau kebudayaan hendak dileburkan dengan suatu kebudayaan bersama maka sudah tentu kelak tidak bersesuaian lagi dengan

ajaran Islam! Bertentangan apalagi dan orang Islam wajib bertahan di atasnya.

* * *

Dalam masa penganas mengaruk di Persekutuan maka orang-orang banyak berpindah ke Singapura dan harga rumah tanah membubung naik. Tetapi apabila perubahan siasah di Singapura mulai mengubah coraknya dan Malaya telah merdeka maka tadinya perusahaan yang beribu pejabat di Singapura telah mengubah ibu pejabatnya di Persekutuan – dan di Singapura hanya jadi cawangan sahaja - ertiinya usaha perniagaan semakin kecil. Kalau Singapura tadinya menjadi tempat perniagaan bebas dan bergantung hanya semata-mata kepada perusahaan maka sekarang kerana perpindahan itu keadaannya makin berkurang apalagi di dalam perusahaan-perusahaan¹ dijalankan peraturan-peraturan undang-undang yang bertambah-tambah lagi memberatkan kepada tuan punya-punya punya perusahaan, khususnya perusahaan kecil. Kalau dahulu yang besar-besar sahaja yang berpindah maka harus jika keadaan bertambah berat yang kecil-kecil pun mau berpindah – akhirnya orang yang tiada kerja semakin banyak – perusahaan makin kurang yang ertiinya pencarian sara hidup semakin terdesak dan umat mengeluh bukannya seperti dahulu beberapa peringkat sahaja tetapi sekarang rata-rata. Di Persekutuan harga rumah tanah naik sedang di Singapura semakin rendah bahkan perniagaan yang banyak membawa hasil ini sekarang hampir-hampir beku. Kalau ditanya kepada orang-orang bijak pandai kita mereka hanya berkata: “Tengok dan lihat dahulu!”

* * *

Banyak perkara-perkara yang dibuat kerajaan Singapura sekarang menurut pendapat sebahagian orang, setelah melihat perkara-perkara yang berlaku, bahawa cara-cara ini adalah untuk amaran kepada umat bahawa mereka mesti pakai “inggih”² sahaja kata orang-orang ini ertiinya tuan sendiri mesti

tau Bung! Banyak bicara banyak risikonya! Hak kalau mau didirikan tanggungjawabnya banyak kerana itu kalau mau bicarakan hak tetapkan iman dahulu.

* * *

Bacalah!

Buku-buku Syuhada Islam

Disusun oleh

‘Idrūs

1. Ḥamzah ibn ‘Abd al-Muṭalib	50 sen
2. Nusaybah – Pahlawan Wanita Islam	50 “
3. ‘Ikrimah ibn Abū Jahl	50 “
4. Sa‘ad ibn Rabī‘	50 “
5. Sa‘ad ibn Mu‘ādh	50 “
6. Nu‘mān ibn Muqrān	50 “
7. Ja‘far ibn Abī Ṭālib	50 “
8. Anak ‘Abd Allāh ibn Ubay	50 “
9. Anak Angkat Rasulullah	50 “
10. Abū Hudhayfah ibn ‘Utbah	50 “

Lain-lain Buku Tārīkh

Sejarah Ringkas Muḥammad (S.A.W.) (oleh ‘Idrūs) \$1.20

Bilāl – (Oleh Abdullah Basmeh) \$1.20

Muhammad (S.A.W.) (oleh Abdullah Basmeh) Empat Penggal

sepenggal \$1.20

Pesanlah kepada penerbitnya:

Qalam, Singapura

¹ Perkataan sebetulnya seperti dalam teks ialah perusahaan

² Teks barangkali merujuk kepada ‘Ringgit’.